

Berjudi di tempat awam, lelaki didenda RM2,000

MIRI: Seorang lelaki didenda RM2,000 atau dua bulan penjara oleh Mahkamah Majistret kerana kesalahan bermain judi haram di tempat awam.

Abdul Khalid Sham, 24, dari Kampung Pujut Padang Kerbau di sini, telah didakwa mengikut Seksyen 7 (2) Akta Rumah Judi Terbuka 1953 yang boleh membawa

hukuman denda maksimum RM5,000 atau penjara sehingga enam bulan atau kedua-duanya sekali jika sabit kesalahan.

Menurut keterangan kes, sekitar jam 6.10 petang, 27 April tahun ini, sepasukan polis diketuai ACP Alexson Naga Chabu yang melakukan Ops Dadu telah membuat pemeriksaan ke atas sebuah

premis di Jalan Marina di sini.

Dalam pemeriksaan itu, mereka telah menahan seorang lelaki untuk tujuan pemeriksaan kerana disyaki terlibat kegiatan perjudian dalam talian.

Hasil pemeriksaan mendapati telefon pintar tertuduh memaparkan aplikasi judi jenis judi dalam

talian.

Berikutan itu, tertuduh kemudian ditangkap dan telefon bimbitnya dirampas untuk dijadikan barang kes.

Hasil siasatan lanjut polis, tertuduh mengaku bahawa semasa ditangkap dia sedang bermain judi jenis dalam talian di tempat awam tanpa mempunyai lesen sah.

Di hadapan mahkamah,

tertuduh merayu hukuman yang ringan memandangkan ini adalah kesalahan pertamanya, tambahan pula dia tidak mempunyai pendapatan tetap.

Pendakwaan dilakukan Inspektor Syahrizan Taha di hadapan Majistret Nazira Adlin Ahmad Khairul Razi manakala tertuduh tidak diwakili peguam bela.